



PHILIPPO II.

HISPANIARVM REGI

CATHOLICO POTENTISSIMO

ET INVICTISSIMO

CAESAR BARONIVS SORANVS CONGREGATIONIS

Oratorij Presbyter sempiternam felicitatem.



VID Deo, quid Principibus debeatur, Apostolorum Princeps breui 1. Pet. 2. illa sententia definiuit: Deum time-
te, Regem honorificate. Qui vero
inter Deum atque Reges medij in-
tercedunt Sacerdotes, duplici dignos honore Paulus 1. Timoth. 7.
Apostolus iudicauit. His ego legibus parens, an-
te omnes summo totius Christianæ religionis Anti-
stiti duplex munus, nempe primum & secundum
Annalium tomos obtuli: Hic vero tertius ex Con-
stantini Magni magnis rebus gestis contextus, tibi,
PHILIPPE Regum maxime, de industria (quod Sa- 1. Reg. 9.
muel dixit) seruatus est, Regium plane munus, ex
Regijs depromptum thesauris, Rege maxime pio
dignum

dignum : Regum namque est Annales legere ; quos ex eorum lectione magnos constat fecisse progressus , animumque ad res magnas inchoandas & perficiendas erexisse . cuius rei etsi complura suppetere possent exempla : vnum vel alterum ex sacris litteris adduxisse , contenti erimus . Certe ex Annalium lectione potentissimus ille Rex Assuerus , quid virtuti , quid sceleri deberetur , accepit ; summoque iustitiæ libramento , suum cuique tribuens , periclitantem sub gladio Dei populum liberavit , atque superbissimum Aman infami supplicio condemnauit . Sed & Darius Rex vna Annalium inspectione pietatem didicit , cum ex Cyri Regis præscripto non solum aduersarios Iudæorum ædificantium Dei templum cohibuit , verum etiam immensæ molis opus suis sumptibus absoluendum , & sacrificia immolanda , vt dignum erat Regia munificentia , curauit ; nouitque Deum timere , quem & Iudæorum precibus optauit sibi esse placatum .

Esther. 6.

1. Esdr. 6.

Matth. 17.

Quod igitur Regem decet accipere , æque congruit a sacerdote tibi ortu & origine subdito imperitari . Non enim eximit sacerdotium ab illa pensitatione tributi , qua scilicet Reges possint effici sanctiores ; persoluentibus alijs censum , ex quo ditiores reddantur . Docuit nos Dominus , quodnam sacerdotes pendere debeant Regibus tributum , staterem nempe , eundemque in ore piscis inuentum , quem & iussu Domini Petrus hamo piscatus esset , quatuor drachmarum pretij nummum . Quibus
sym-

symbolicis formulis, veluti hieroglyphicis characteribus, vna fides Catholica quatuor Euangelij con-
signata, oreque Apostolico prædicata ostenditur.

Quod quidem tributi genus a me Amplissimæ
Maiestati tuæ, non vt indigenti persoluitur, vtpote
hisce diuitijs largiter affluenti, ex eisque vniuersum
Nouum Orbem (quod plane est valde admiran-
dum) vbertim locupletanti; sed quòd religio, pietasq.
tua id iure suo quodammodo exigat; & obsequium,
studium, obseruantiaque in te mea hoc ipsum po-
stulare omnino videatur. Quamobrem quod mea-
rum partium est, imperatum diuina lege tributum
infero in magnum illud tuæ pietatis Aerarium, per-
soluens staterem illum in ore illius piscis inuentum,
quem Christus ipse salutari signo, mira quadam ra-
tione de cælo piscatus, ostensa nimium cælitus Cru-
ce, velut hamo, vincendi spe, dulci captum esca, e
fluctibus impietatis ad littus eductum Ecclesiæ, per-
traxit ad fidem: magnus sane piscis, in cuius ore sta-
ter inuentus tot posteros ditauit Imperatores. Pen-
ditur hic ipse a me tibi, dum quæ ab eodem Con-
stantino in fide capessenda, tuenda, illustranda,
amplificanda, & ad exteros longe lateque propagan-
da gesta sunt, annis singulis, tertio hoc Annalium
tomo, summa fide potissimum exhibentur.

Accipe ergo grato animo, quod pio affectu per-
soluitur, sacerdotale tributum, staterem sacrum,
numisma nobile imagine Cæsaris insignitum, tibi
tamquam Cæsari debitum, a Cæsare exhibitum,

Regique Catholico iure pensum; quod & præclaro
fidei signo, salutiferæ Crucis vexillo extat impres-
sum: illud vero tunc locupletius exhibendum, cum
ex suscepto semel munere, res a te pie sancteque
gestæ annis singulis, iisdem Annalibus suo quæque
tempore feliciter intextentur, quas posterī Reges sint
admiraturi, utinam & imitaturi; cum de te longe
plura atque maiora vere narrata esse comperient,
quàm nec Xenophon in Cyro effinxit, neque de
Christianis Principibus multa abhinc retro sæcula
conspexere. Vale, Rex inclyte, Christianorum
Regum maximum decus & ornamentum: teque
ardentissimo studio Catholicam fidem strenue pro-
tegentem, ac latissime propagantem, diu supersti-
tem Deus conferuet incolumem; atque demum
immortalis quoque gloriæ corona fulgentissima au-
ctum, in consortium Regni cælestis accipiat.

